

25% No Ta Basta!

Fo'i tempran solo a kima benout, sin miserikòrdia. E biantunan suave ku sa freska nos isla atrobe tabata oussente. Ma no opstante e kalor sofokante, un ehersito formidabel di 2705 partisipante (mas òf ménos 25% di nos poblashon) a subi kaya den wikènt ku a pasa, armá ku palu, harka, chapi, i prinsipalmente sakunan blanku dòrná ku emblema kòrá ku blou di Wayne Feeds. Otronan a piki sushi na playanan. Asta e akshon di limpiesa a tuma lugá bou di awa. Nobent'i ocho sambuyadó a kolektá 200 saku di sushi den laman den tres ora.

"Ban Hasi Boneiru Limpi" tabata e lema, i nos isla a keda 3326 saku mas limpi ku e tabata. Ma kasi promé ku e "ehersito" kansá, kimá, i sodá a kompletá nan trayekto i a bai kas satesfecho ku loke nan a logra, esnan ku e mentalidat "Ban Hasi Boneiru Sushi Atrobe" a bira aktivo. Atrobe por mira kùp, bòter di Heineken, bleki di Polar bentá kantu di kamina unda a piki sushi algun ora promé.

Nos a kaba di hasi Boneiru limpi. Pakiko nos isla no por KEDA asina? Por tin vários kontesta.

Falta di edukashon sigur ta un motibu. Hopi di nos a lamta ku e mentalida ku henter nos isla ta un lèntfel grandi. Ora bo a kaba bebe e kontenido di bo kùp òf bòter, por zuai e unda ku ta. Awor ta komo sifuera nos ta tende un mensahe nobo: baki di sushi tin un proposito útil. Poko poko nos komunidad ta kuminsá komprendé i kambia nan sistema di antes!

Flohera ta un otro motibu. Tin bes, kasi por haña e impreshon ku e dies stap pa yega na e baki di sushi ta un kansansio enorme, òf ta demandá demasiado energia pa kana ku un kùp bashí den man te ora bo ta haña un bari di sushi pa deposit'é. Por siertu e kùp ta hopi pisá, i e echu ku bo mannan no ta liber sigur ta okashoná un trouma. Pa evitá e emergensia sikológiko i potensialmente médiko ku e kùp ei por okashoná, ta imperativo pa deshás di dje inmediatamente irespekto di e sitio ku bo por ta; sea ta bou di palu, dilanti kas di hende, den outo, èts. Otronan aparentemente tin e impreshon ku ta kosta muchu esfuerso, tempu, i gasolin pa hiba nan pikòp yen di sushi na lèntfel na Lagun. Ta muchu mas fásil pa bent'é den mondi.

Sin duda egoismo ta un di e motibunan prinsipal ku nos isla ta sushi. Dios ta eksigí pa nos "stima nos próhimo méskos ku nos mes" (Levitiko 19:18). Si bo ta benta un kùp riba kaya, bo ta ignorá e mandamentu aki. Pensa un ratu kon e 1 kùp ei, huntu ku tur e otro kùpnan, bòteranan, papel, bleki, èts. por afektá otro hende. BO KUP por afektá e impreshon ku turistanan ta haña di nos isla. Nan impreshon ta afektá nos ekonomia, i nos ekonomia tin un afekto riba nos tur. Bientu por manda BO KUP den kurá di otro hende. Sigur habitantenan di e kas ei lo no haña ku bo kùp sushi den nan kurá ta un gesto di amor. Bo lo ni pensa mes di benta e kùp den bo kurá, ma no ta importábo si bo kùp ta resultá den kurá di otro hende. Den temporada di yobida, BO KUP por yena ku awa i bira un lugá pa sangura brui, tambe afektando bo próhimo.

Ma nos no ta solamente egoista pa ku hende. Nos asta ta egoista pa ku nos Kreador. "Tera ta di SEÑOR, i tur loke e ta kontené, mundu, i esnan ku ta biba den djé." "Laman ta di djE, pasobra E ta Esun ku a trah'é. Su mannan a forma tera seku" (Salmo 24:1; 95:5). Pasobra Dios a krea mundu, E--no hende--ta Doño di mundu, i di nos isla. Ora Dios a krea mundu, El a kre'é limpi. Dios a duna hende e privilegio i responsabilidat pa atministrá i kuida Su kreashon. Kon nos por ta asina tribí pa susha loke ta pertenesé na Dios?

Falta di edukashon, flohera, òf egoismo, tur ta kontribuí na un isla sushi. Nos tin ku hasi nos isla limpi. Tin hende ku ta hasi esei pa bienestar di turismo. Otronan ta motivá pa gana premionan ofresé pa Komishon Tene Boneiru Limpi. Algun ta konsiente ku un isla limpi ta mihó pa nos salú. Ma finalmente komo ku Dios ta Doño di nos isla, ora nos ta hasi nos isla limpi i manten'é limpi, nos ta hasié pa Dios!

Kasi 25% di e poblashon di nos isla a lucha huntu ku e meta, "Ban Hasi Boneiru Limpi." Ma nos pida baranka lo no KEDA limpi sin koperashon di nos TUR. Pa nos por MANTENE Boneiru limpi, tin mester di koperashon di SHEN PORSHENTO!